

8. maj 2019

UPA 2019/117

Meeqqat atuarianni pisortat, ullumikkut piumasaqaataareersut saniatigut, pisortaasinnaanissaminnut atuarianni pisortatut ilinniagaqarsimanissaannut piumasaqaateqarnissaq pillugu Naalakkersuisut siunnersuummik suliaqaqqullugit peqquneqarnissaannik siunnersuut. Piumasaqaat ilinniartitaanikkut aqqissusseqqinneq aallartinneqarsimasoq eqqarsaatigalugu meeqqat atuariat pillugu inatsisissatut siunnersuutissatut naatsorsuutigineqartumut kingusinnerpaamik ilanngunneqassaaq.

(Inatsisartunut ilaasortaq, Sofia Geisler, Inuit Ataqtigiit)

Inatsisartuni Inuit Ataqtigiit sinnerlugit ilaasortaq Sofia Geisler siunnersuutaa Siumumiik imaattumik oqaaseqarfigissuarput.

Ulluni makkunani Naalakkersuisut siunnersuutaat ataatsimiititaliami suliarivagut nunatsinni ilinniartit pisortaasa qanoq ilinniagaqarsimanissaannik piumasaqaateqassanersugut, taamatutaaq qulaani siunnersuuteqartup anguniarpaa meeqqat atuarianni pisortat piumasaqaataareersut saniatigut pisortaanissaminnut ilinniagaqarsimanissaannut piumasaqaateqartalernissaq.

Siumumiit oqaatigissuarput nunatsinni ilinniarsimassutsikkut ineriartortuarnissaq pingaartittuuartuugatsigu. Nunarsuarmioqatigut qiviaraanni sukkasuumik ineriartortoqarpoq uagutsinnutaaq pingaarpoq nunatta ilinniarsimassutsikkut malinnaalluarnissaa soorluttaaq Siumumi pingaartikkipput pitsaanerpaamik aqutsisoqarluta inerisaaqataanissarput.

Assersuutigilara umiartorluta ingerlavitsinni umiarsuaq igasumik naalagaqarsimappat umiarsuarmilu aquttutut ilinniarsimangitsumik, taava pisussaaffiit ilisimasassarpasuit assigiinngitsut akisussaaffigineqartut amigartutut isigineqassapput. Taamaammat umiarsuaq naalagaqartariaqarpoq imal. aquttoqartariaqarpoq umiarsuarmi aquttuunissamut allagartaqarluni ilinniarsimasumik ilaasut toqqqissimallutik angalasinnaaniassammata. Taamaammat Siumumiit pitsaassuseq isumannaarneqartuarnissaa siunissaq eqqarsaatigalugu atuarfeqarfinni allanillu ilinniartit inerisaaqataaffigissallugu piumassuseqarpugut.

Ukiualuit matuma siorna kingumut qiviarutta nunatsinni sumiluunniit pisortaasut tikisitaakkajuttarput, qujanartumilli siuariartorpugut tassami kalaaleqaterpassuagut suliffeqarfinni assigiinngitsuni pisortaasut amerliartuinnarput. Atuarianniinngaangitsoq sulliffeqarfinni aamma allani pisortaasartut kalaallit siuarsaaviginiarlugit Pisortatut Ilisimatusarfik pilersinneqarnikuvoq ullumikkullu ilisimavarput amerlasoorpassuit aqutsisutut naammassinikuusut taassuma saniatigut atuarianni pisortassatut ilinniartit kajumissuseq tunngavigalugu maanna ingerlanneqartarpoq taamatut Diplomitut ilinniartit ukiunik pingasunik sivilisussusilik tunngavigalugu naammassisartut amerliartorput. Suliniutit taamaattut saniatigut kommuunit namminneq piumassusertik tunngavigalugu pikkorissaasarput aammali pikkorissaaginnaratik pisortaasunut atugassarititaasut pitsanngorsaavigineqarlutik. Taamaattorli suli annertuumik unammilligassaqarpugut tassami ukiup ataatsip ingerlanerinnaani pisortat taarsaanneri ullumikkut takussaapput.

Ullumikkut meeqqat atuarfianni naammassisartut ingerlaqqittartullu qiviaraanni angusagut suli naammaqqajangillat tassami amerlavallaarujussuarput unittuinnartartut. Taamaamat siunissaq qaninnerusooq isigalugu Siumumi anguniarparput sapinngisamik meeqqat atuartut tamarmik ilinniakkamik naammassinnittalernissaat. Anguniagaq taanna anguniarlugu qinigaaffik kingulleq Ilinniartitaanermut Naalakkersuisuuninni naalakkersuisut allat peqatigalugit, atuartitaanerup ilinniartitaanerullu ataqtigiissumik aqqissuuteqqinnera aallartipparput. Suleqatigiissitat maanna sulillutik aallartereernikuupput neriulluarpugullu aqqissuusseqqinneq siunissami kinguneqarluassasoq meerartatta annertunerusumik ilinniagaqalernissaannik.

Atuarfik ingerlalluartoq meeqqallu angusarissaartut anguniaraanni suliassaq annertuvoq, minnerpaamik angajoqqaat peqataalluartaqarput meeqqaminnullu tapersersuillutik, ilinniartitsisut tunniutiinnajasuunatillu eqeersimaartuusariaqarput soorluttaaq pisortaasoq ilinniartitsisut sulinerannut meeqqallu atuagarsornikkut anguniagaannut malittarinnilluartaqartoq. Atuarfiup saniatigut angajoqqaat sinniisaat kommunalbestyrelselu annertuumik eqeersimaartariaqarput siuarsaaqataallutillu.

Siumumi isumaqarpugut siunertaq tassalu atuarfinni pisortaasut siunissami tamarmik pisortatut ilinniarsimasuunissaannik anguniagaqarneq immi pitsaasuusooq ilisimavarpullu atuarfinni pisortaasut ilarpassui masteritut ilinniartitaanermik ingerlatsilereersimasut.

Paasivarput Naalakkersuisut akissuteqaataat tunngavigalugu pilersaarummi suliarineqartumi pingaarutilittut anguniagaq inissinniaaraat. Oqaloqatigiinnerit maanna ingerlasut Ilinniartitaanermut pilersaarutiniq itisiliinermik ilaqartinniarnaqarput, piginnaasaqalernissamut suliniutip sumi ingerlanneqarnissaanut tunngatillugu. Taamaamat Siumumiit Naalakkersuisut isumaqatigaavut, siunnersuutillu itigartinneqarnissaanut isumaqataalluta.

Doris Jakobsen Jensen, Siumut